


三渠先生集

匏



重刻三渠先生集目九之十一

卷

卷之九

序

贈林御史考績序


壽大宗伯毅齋孫公七十序

壽總督太華何公八十序

壽王府尹薇田六十序

贈栗方伯健齋膺三代

誥命序



寧河武順王家譜序

曠典鮑封序

贈總督石毅菴三載考績序

送姜蒙泉赴河南按察使序

送楊彬菴憲副之任山東序

贈國博陳君權 韓府左長史序

卷之十

記碑

重建陝西城樓記

華陰縣何侯去思碑

卷之十一

行狀

文淵閣大學士松臯許公行狀

重刻三渠先生集卷之九

鮑

贈林御史考績序

林君爲南京御史檢身執憲釐蠹芟蕝慨然
有以天下自任之志嘗數上封事略曰臣聞
海儒生遭逢

聖主廟登甲第殆逾八年筮宰臨川慙無寸禪
乃今職司風紀視倉中都補闕拾遺臣之分
也夫

天潢日衍其麗不億失變通之道昧久遠之圖

供億不支氓黎備竭矣於是䟽處宗裔容民
畜衆易訓孔彰今剝民養兵兵不足特徵民
禦侮民困益滋於是䟽實軍伍諸邊飛輓淮
海攸需乃今有三害焉入粟之制盡廢也餘
鹽之利太多也委積之徵太急也有一於斯
邊商困矣於是䟽理鹽法倭夷入閩莆陽嬰
禍爰劉我人民剝削我積貯毀夷我城郭焚
燒我宮室平定安輯勢急拯溺於是䟽復郡
治正名之徵孔子所先無將之言春秋示戒
乃若伊瀋驕僭稔惡不悛苟失預防後將滋
蔓於是䟽抑藩府比暱日滋則廉耻道消官
常日頽則庶事隳挫故曰國家之弊由官邪
官之失職寵賂彰也於是䟽警有位夫處宗
裔所以保治也實軍伍所以節費也理鹽法
所以裕邊也復郡治所以圖存也抑藩府所
以睦親也警有位所以貞度也六者天下之
大政也君親每上

上卽是其言

命廷臣計議而伊之僭閭之患亟處分焉由是
中外翹然知有林御史矣史氏曰余讀林子
之疏而仰窺我

皇上之益聖也夫人臣非言之患而識時務之
患非識時務之患而悟主之患易曰納約自
牖詩曰如彼飛虫時弋亦獲言進言之職不
易居而受言之君不易遇昔漢之賈誼唐之
韓愈宋之唐介讜言正議焜耀一時然皆不
能安於其位論者惜焉今

聖天子受言遠軼三代而君以方剛之年居紀
綱之地威望足以震懾奸回獻納足以疏通
幽滯昔人謂仕宦有三榮而御史爲尤重以
君觀之可謂稱名實矣然人臣之進言也猶
醫之診脉用藥也主人知醫之良而委信之
篤則醫將畢獻其術而盡祛其病矣今天下
之病不止於六也君圖報寒暑思所以盡其
術邪夫難識者幾難逢者時知者審幾而勇
者乘時泰之九二日用焉河得尚於中行是

又天下屬望於君者也君三載考績侍御諸君子徵文爲贈余以目疾強爲叙述如此

壽大宗伯毅齋孫公七十序

毅齋先生事

今上蓋三十年所矣逮晚節

上眷之篤權爲禮部尚書兼掌詹事一身至領兩省焉最異數也居無何有以言侵先生者先生力疏歸松江歸一年

上念之召之還復領舊銜掌詹事其年爲庚戌先生壽七十歲矣傳曰七十杖於國言老臣在廷神氣就衰不用常儀煩苦之也先生既七十而筋力愈益勁有事宮廟竟無惰容強年者顧或弗如國有老成若此豈非幸哉夫聰明術智盛年茂才以辦事易也以終事難也以承君之命易也以寄君之重難也而老成人者其敦朴若愚其退默若懦人君欲托重而求竟所事非斯人莫與也

聖天子覽察郡臣既久而在廷大臣凡踰七

十者皆固留不許歸于是黃髮之老間列朝
省謀國任重爲萬年計此

聖知高遠弗可及也初先生承

上眷時縉紳之士咸爲震耀乃先生不色矜一
如固有比言者至先生第曰我固當歸鏤金
銷骨不自明也老莊之論主在定神齊物可
以長生乃吾今信之矣先生少負文采每一
撰書輒動京師今老矣至操觚揮霍不減曩
時讀其詞猶尚振振燁燁千人可廢也世獨
曰孫先生老成人尔淺乎睹矣

上好文最甚大臣在左右者往往責以文詞若
先生者今得登進而近左右其文詞自當

上意何疑哉語云福至不期喜來有因固且峽
之先生醇德真氣薰灼詞垣自大宗伯少湖
徐公而下凡若干人咸相率造先生庭再拜
壽先生莫有後者可以卜大情矣予受簡屬
詞詞曰昔漢高任周勃謂其重厚顧獨少文
爾今先生厚重似勃而文復郁然

上竟用之掌詹事不以他代有意哉矧年七十而徤乎此其中天必監之人不可測也

壽總督太華何公八表序

在昔嘉靖庚戌秋八月胡虜猖獗內犯畿輔虔劉焚劫之患震驚 闕廷我

世宗皇帝宵旰軫憂布昭 神武 召選總督

大臣開府薊州屏翰京師是時太華老先生何公以僉都御史家居大臣論薦大略謂先生巡撫大同威震瓊表修復漕河歲省挽費

助庸茂著中外共惜弘濟時艱宜莫先者疏 奏

上特允之乃晉副都 賜璽書俾令遄往未幾

晉少司馬而以保定遼陽二鎮屬焉輿情慰服特以不恐云先生感激遭際矢心經略選將訓兵分區別戍峻築邊城申嚴賞罰奏疏累上悉安攘至計於是三鎮遵奉約束較若畫一矣先生曰治病者察脉理錡莠者除本根曩歲之患究在一二黠虜爲嚮道爾傾之

俘其導者二人奏獻於 廷

天子嘉之蔭子進秩於是諸虜震懼率衆遠遁
矣先生在鎮三年 召陟右都勞憊思歸懇
乞休致既獲

俞旨閉門靜攝客或以大政諮諏輒析別利害
推原始終覩縷千言如在掌上殆楚丘子所
謂超距則老謀國尚壯者也今年己巳先生
壽登八十九月六日實惟誕辰先生仲子國
學生瑛以用賓受業先生門下宜爲文以賀

賓曰先生百歲八十蓋始賀也夫大臣者上
壽國次壽民次壽身詩曰樂只君子萬壽無
期言壽國壽民壽當萬年也蓋有道之世天
心篤佑必翊以秉德靖其之臣界之恢宏卓
絕之才歷諸盤錯糾紛之任老其艱貞惕厲
之心是故進則匡正王國樹勛揚烈退則勵
翼丘樊移風厚俗穀穀聲宜受天百祿有弗
克違者矣昔裴晉公淮蔡功成堂開綠野探
竒尋好蕭散東都文潞公至和謝政會列耆

英圖像賦詩洛中傳誦乃若先生殊勲偉望
追媿二公而結社醜會優游泉石逾十年於
茲矣且仲氏端穎力學待用冢孫濟美金紫
焜煌卽今拜慶屆期仲孫報誕生矣夫天降
時兩山川出雲者欲將至有開必先由今觀
之謂先生百歲者此非徵邪雖然寘又有說
焉日者仇氏貪功請伐三衛 朝議洶洶國
是動搖先生抗疏諫阻待罪橐卧謂徹我藩
籬資彼驕虜是傅虎以翼救焚以膏爾卒之
帝心悔悟生靈保全先生之功又豈尋常者哉
昔宋知制誥王祖以百口保紆彥卿封晉國
公仲子文正爲宋名相諸子若孫貴顯赫奕
論者謂祐陰德所致今先生視祐陰德其輕
重多寡較然矣是先生之功又將爲子孫壽
也故曰先生百歲八十益始賀也

壽王府尹薇田六十序

應天府府尹薇田王君奉

旨聽用之八年爲萬曆元年君壽登六十矣先

是始蘇潘治中者聞謂君曰潘世右族頃充
賦長夫賦長之家十傾七八竊爲族人危焉
君曰傳有之葵猶衛足有京兆不能庇家者
刑乃即日移書白於巡按御史御史以君私
於察案上疏論列竟報回籍云旣家居杜門
謝客力課耕耘肆採墳典時與舊游諸君子
結社賦詩選勝醜會於是陝之督府兩臺先
後諸公雅重君名累疏薦辟大略謂君學行
精醇世務練達跡若私於寮友實則敦乎澆
俗夫合抱之木不嫌尺朽連城之壁不掩微
瑕况無朽無瑕者和是故

朝議允協中外喁喁然望君起矣今年癸酉十
二月廿六日實君誕辰鄉之諸縉紳先生徵
文於余以壽君余曩歲叨冒七十君爲製古
文辭錦軸緗帙玉映金輝乃今報愧瓊瑤而
祝願之忱固惓惓也焉敢以老病辭夫壽者
受也厚也天錫之而人植之者也維曰天錫
則厚之者篤矣孔子曰栽者培之是也維曰

人植則受之者光矣詩曰樂只君子萬壽無疆是也乃若人臣之義壽國爲上壽身次之然惟壽身者乃能壽國未有不能自壽而能壽國者也惟君初爲大行奉使朝鮮繼爲諫官徧歷瑣闥兩擢太僕一佐廷尉其專對之才匪躬之節淵塞之心平反之政華夷內外勛望赫奕晉陟方隆忽遭萋菲乃今棲息原野聲聞益熾耀驪珠於滄溟徹劍氣於牛斗易之所謂井渫不食爲我心惻者也夫善治病者索和扁善治國者求伊旦今

天子明聖 寤寐思賢旦夕將 召君入表列

公卿黼黻

皇敵弼贊化理 國家衍無疆之庥君亦未無窮之譽矣是君之壽所以壽天下者也曰天錫之人植之也或曰君之植壽猶有進於是者輿曰有在昔嘉靖間文教聿興士敦本實太平旣久習俗漸移廣延納者托之授學思比昵者托之求誨反醇爲漓斷觚爲圓吾道

之元氣索矣是時君爲諫官殆將十年正色
獨立竝不少易陽好而陰踈者益比比也顧
今世道轉還輿論歸君由是觀之果孰爲得
失哉嗟乎洪河之水萬折必東豫章之材千
尋彌直性固然也即君再起定執此以往爾
是又君植壽之道也於是諸緝紳載酒束幣
往以壽君

贈栗方伯健齋膺三代

誥命序

聖天子握符 御曆改元隆慶勅謹 萬幾肅
禮百神褒顯忠良綏養氓庶夙弊積蠹釐刻
無遺海宇嚮風易俗改觀固太平有道之極
也明年戊辰

上用禮部議冊建元良以荅輿情 詔內外諸
臣贈封如制陝西左布政使健齋栗公進階
爲二品大夫配封夫人大父暨父俱贈如公
官大母暨母俱贈爲夫人云先是公以述職
獲覲 闕廷上䟽略曰仰惟

皇上大孝 尊親至仁錫類兩京有位悉荷

綸綍褒崇先世矣臣惟海內臣工私願惟均伏望

聖慈垂察一體頌恩不勝幸甚

上是其言乃下 詔如疏所請云君子曰純哉

公之孝也仁哉公之疏也夫士之登仕未有
不先欲顯揚其親者然恩以勞加世以位限
逮及祖者惟兩都大僚列省藩伯積有年勛
乃獲與爾然兩都嘗獲奏考而藩伯遷陟靡
常益有突不得黔席不暇煖者是故兩都沾
恩十獲八九藩伯沾恩百無一二今

聖明以大慶推 恩特及於公是曠世之 殊

渥人臣之極遇雖先世厚德種福有自而公
之夙夜樹立思欲顯揚之心至是慰矣故曰
公純孝也人臣獻納因辭以宣辭指有廣狹
故感應有淺深在昔先達嘗有覬恩賜封者
矣夷考其說祇及所私憧憧往來未光大也
乃今觀公之疏廣哉熙熙乎其思周其利博

與物偕春其立已立人達已達人之心乎是故

聖主嘉之群工德之士庶榮之寰宇誦之謂非有德者之言可邪故曰公仁人也西安守姚江邵公躬覩其盛乃偕寮案諸君授簡於賓俾贈賀言賓曰公之可賀尚有進於是者夫豫章之材大厦求焉卞和之璧清廟需焉社稷之臣明主任焉公以醇學粹德發解三晉登甲科躋黉仕益三十年於茲矣然其保釐西土也裕民眷士均田甃城外給邊園內實庾稟善政種種不能備述即其大公一疏而他日佐理天下之道可徵也昔魏相條陳便宜孝宣中興鄭公䟽進讜言貞觀致治今聖主側席求賢行將晉公端揆弼贊化理其陳善納忠蓋將媿休古之大臣有非後世所能及者矣詩曰衮職有闕惟仲山甫補之又曰愷悌君子福祿攸降敢以是豫爲天下慶而又爲公賀之

寧河武順王家譜序

自古開天肇運之君受命握符混一區宇必有豪傑之才應時挺生翊贊功業光昭一統之盛易曰雲從龍風從虎匪偶然也我

聖祖奮飛淮甸汎掃腥膻一時佐命功臣川湧雲集若寧河武順王鄧公尤錚錚者方

聖祖駐師滁陽公甫踰童年仗劍來從遂渡大江克采石殲僞漢平隴右開疆闢土百戰無敵位躋上公追封王爵蓋

聖祖之所以報公而公之所以享其報者至矣既而長子嗣爵改封申國未幾以後寢以微眇嘉靖壬辰我

世宗肅皇帝追念公功封六世孫繼坤爲定遠侯俾世襲焉於是海內欣然復知有鄧氏矣予徃在留都聞公八世孫武濟因族譜未詳派系或紊乃做太史公年表繪圖定式等倫區分券詞墓碑悉登記載頃如關謁余請爲序之予讀之謂武濟曰譜所以昭先烈而傳

後裔也昭先思孝思孝則敬畏生敬畏生傳
斯遠矣不思則驕驕則災害生災害生傳斯
室矣昔漢祖白馬之盟曰黃河如帶太山若
礪國以求存終漢之世功臣同休者幾何人
哉弗思故爾史稱公天性孝友蹈履仁厚勞
而不伐滿而不溢夫孝弟敦本也仁厚植善
也不伐守謙也不溢循禮也四者德之大也
福之基也乃若公之孫子能慎思而率由之
則所以藩屏

皇圖而爲龍爲光者繩繩罔替矣書曰慎厥身
脩求思詩曰無念爾祖聿修厥德爲鄧氏者
尚求鑒於茲哉

曠典貽封序

昔宋仁宗命司馬文正公曰自親以上非予
丞弼之家莫獲褒顯君子之孝至於尊祖以
及其親以隆其家可謂至矣夫文正爲宋賢
相功在社稷名著華夷帝之爲言若此豈非
重一代之制不輕異臣下也哉我

明以孝治天下人臣三品推恩及祖又必有
大勲德大勞勩者本生大父間一與焉蓋視
前代之典尤重且備也隆慶二年戊辰春三
月

上用禮官議冊立東宮以慰輿情詔諭臣
工贈封如制少司馬撫巡元洲張公上䟽略
曰仰惟

皇上登極大孝尊親至仁錫類覃恩臣下
如天之覆是時臣總督漕運祖父祖母荷蒙
贈恩不勝慶幸矣但臣本生之祖實生臣父
教育之恩二祖均同今臣祖旣荷殊渥而
本生未沾一命臣心日夜實切覬私展轉歛
歛不能自己今明詔再頒天恩益溥願以
臣先年應給誥命及臣妻應受之封贈
本生以慰幽冥臣矢竭涓埃永圖報稱死且
不朽也

上覽奏若曰侍郎言是命賜贈本生大父誠齋
公如公官大母林爲淑人云君子曰元洲公

是舉也昭

主聖焉徵先德焉肇世澤焉夫禮以義起恩以位限予之非過濫受之無忤顏斯足以勵世而服人心也我國家勲恩本生大父母者若文貞楊公若鎮山朱公楊以相業朱以河績雖以吳清惠之勞咨累疏陳乞不蒙

俞允他可知矣乃若元洲公高才粹德博學雄文再撫三秦一鎮兩廣佐理戎機總督國餉豐功偉烈焜耀後先是故

天子嘉其忠史冊紀其績士庶歌其德夷夏慕其名二祖並榮輿論允愜謂非

上知公可邪故曰昭主聖也旱麓之詩曰瑟

彼玉璫黃流在中言降福不偶也按公家乘張氏宋洛陽人高宗南渡扈蹕遷杭始祖及曾隱德弗耀迨及贈公孝謹益篤施藥濟人一錢不取郡守鄉飲請列賓位兄弟友于並躋遐齡杭之著姓蓋莫或先焉者語曰積土成山寶藏興焉積水成淵蛟龍生焉毓秀發

序
卷九
祥實肇於此故曰徵先德也曩在 先朝南
北多警士欲致身青雲輒思自炫剽竊武書
託之邊才喜事紛更託之明作在道取容託
之達權色莊行違託之明道公乃遵明憲章
恪守貞一體國裕民罔計功利乃若商洛盜
起關輔騷動公移檄遣官招撫諭以德威群
盜感泣投戈解散嚮微仗公則勞師費餉生
靈糜爛無極也夫活千人者其後必興不者
殺者其昌必遠即今

聖主擢公總憲留都行將黼黻 皇猷畢展蘊
畜 國家綿無疆之祚公亦有無疆之譽矣
詩曰豈弟君子壽考萬年言自天佑之後福
延長也故曰肇世澤也夫彰

聖主之明徵先德之厚啓世澤之長一舉而三
善備焉公純孝也夫維時公將出關關中諸
縉紳趨而賀之製爲歌詩裝潢成帙題曰曠
典貽封以余職司紀述叙諸簡首

贈總督石毅菴三載考績序

明興奄一寰宇文德敷宣武功震耀薄海內外
月窟日域諸夷雄長罔不稽首臣服薦璧貢
琛用昭嚮慕惟是西北胡虜餘孽漸滋部裔
連結歲肆桀驁我

祖宗沿邊列鎮選將戍兵有憲臣以撫綏有督
府以節制侵軼撻伐

宵旰軫憂蓋昔人所謂五帝不能臣三王不能
化者也曩歲款關乞封輸誠互市

先皇帝事下廷議竟

俞允之自是烽堠迹熄邊圉寧謐畫守疆場保
有室家無復虞劉蹂躪之患矣萬曆丁丑總
督陝西邊務右都御史兼少司馬毅菴石公
以互市事竣具疏報成

上心嘉悅洊錫金綺晉公本部尚書總督如制
朝野欣欣舉手相慶陝之藩臬諸大夫雅受
公知徵賓致辭稱賀顧賓老病誼弗克違
乃作而言曰至治無虞惇德凝命君之聖也
乘時輔世宜猷樹勳臣之忠也先是和好初

成

皇上屢降 綸音申飭邊閫

宸慮深遠滾滾幾千餘言大都謂虜性悍黠稱
欺難恃而桑土之憂衣袂之戒尤惓惓焉是
時公以偉望雄才佐理兵樞 廟堂諮議裨
贊居多

上由是益稔知公未幾總督之 命下矣公感
激遭遇伏鉞如關亟移檄三鎮而矢之曰

聖天子丕冒邊氓仁同覆載旁燭虜患明並日

月吾儕職典封疆勉圖報稱惟戰守和三事
而已講信則和渝盟則戰敵退則守不易之
道也然事有緩急施有先後審度較量在人
焉爾嘗諦思之安內所以攘外一勞所以永
逸乘和好之時脩戰守之備此萬全之術禦
虜之上計也乃自綏寧固靖以抵甘肅綿亘
數千里塹山湮谷築壙浚濠礪刃鍛甲結柵
增戍再踰年而工用告成每值互市虜覘我
險備相顧駭愕且陰伐其謀而褫其魄矣公

曰未也吾欲長治久安圖上方略曰廣屯田以實倉廩曰恤衛士以節勞德曰募丁壯以實逃亡曰懸金錢以精射藝曰饗牛酒以作勇敢曰篤信義以移狡獪行之數年元氣內固驅之可以赴水火蹈白刃隱然有虎豹在山之勢矣無何

上特遣少司馬太恒吳公閱歷諸鎮亟疏薦公上由是慰拊驛之思紓西顧之慮行將

召輔機密早展經綸社稷享無疆之祿公亦獲無窮之譽矣崇階豐賚固

上所以酬勲而昭思也是時新命甫下公三載考績具疏以聞

上命給三世 誥命階公資政大夫推贈封大父并父如公官大母并母爲夫人云君子曰榮哉可以觀孝矣夫孝者所以事君也在昔周道中興其詩曰比物四驪閑之維則言思患預防秦虜功也又曰侯誰在矣張仲孝友言親比仁賢克吐猷也今

天子中興媲美於周惟公忠孝超軼古人勒名
鼎彝施聲夷夏殆匪偶然者矣是故觀籌邊
之功而人作忠觀顯親之典而人作孝詩曰
萬邦爲憲公之謂也

送姜蒙泉赴河南按察使序

蒙泉姜君以叅政擢河南按察使憲副余君
憲僉張君咸與君分理江北畿甸而叅戎積
菴楊君則偕君協理海防者也茲走使留都
乞余言贈焉余在昔聞君爲御史有聲內臺
按治激揚風裁尤著比遷山東兵憲駐節維
揚維揚去留都不二百里諸縉紳渡江至留
都者輒能稱說君維揚之政至是三君述君
治績授余余讀之蓋有古保釐之風焉昔有
周盛時周召分陝陝以西周公治之陝以東
召公治之而汝濱江漢諸國靡不從化自是
越裳入貢棠棣興味二公保釐之功彪炳翁
髦載諸簡策後世莫能及也乃若姜君之治
淮揚實當倭夷兵火之餘百需紛沓諸弊蝟

集元元墊溺甚矣君慨然咨嗟洞察隱瘼究利害之源審興革之宜䟽便益之條申綏恤之令與民約束較若畫一謂客兵匱財及簡練士著申嚴紀律不朞月而勁卒獲數萬矣謂軍餉請內帑貸他郡非久便計乃抑諸費摧商稅積贖金自是廩藏充物財用稱足矣定征徭之則釐占役之弊氓吏肅然侵漁歛息矣嚴徹單之禁酌水陸之役奸慝潛懾逋傳紓憊矣庫人專守供辦省矣賦長專運攬解絕矣旌別淑慝風紀振矣嚴督詰捕奸宄歛跡矣其它善政種種不可殫述於是撫巡諸公恊乎於上郡邑尊守於下吏無留奸法無遺滯島夷遁伏海徼肅清而瘡痍之民安養休息無復嗟咨愁怨者矣况君本之以學礪之以貞持之以廉感之以誠公庭晝間手不釋卷屹如鎮嶽煦如春和爲淮揚倚庇者凡六七年豈非所謂古之保釐者邪初君以憲副當遷當道䟽留

聖天子嘉之進君浙江參政今春奏績乃獲茲
擢云頃余又聞淮揚人士君將去河南感戀
涕泣如別父母莫不興君陳懷德之思致詩
人遐福之祝者蓋顯者微之著往者來之徵
也今觀君之感人則河南之治固可占即以
宰輔天下亦可占也

送楊彬菴憲副之任山東序

彬菴楊公以西安守擢山東按察司副使兵
備青州瀕行察宋三君子愀然謂余曰西安
古京兆也守京尹也古之尹京兆者張趙外
鮮聞焉而况於今乎錢穀之司甲於諸郡徵
科繁殷出納填委有撫字之心能盡施乎監
司期會動相掣肘兢兢然不敢自裁有善政
能盡行乎賓客絡繹簿書紛紜吏馬行以待
判民林立以待理累島忝然不絕也匪異才能
無眩乎是故今之難守者宜莫如西安也乃
若公以沉毅之姿編經濟之略比部馳聲來
蒞於茲蓋甫及三年矣節堅素絲後民弗擾

守法畫一故上弗嫌才勵明作故事弗滯是
故百廢式舉六事聿脩治化浹洽洋洋乎頌
聲四達矣茲去也何時以爲安邪余曰不然
天生仁賢固將以輔世也而獨一方爲哉夫
峻節以檢身守法以體國明作以廣業皆君
子之道天下所恃以爲安者也而獨一方之
恃乎哉是故山東之民猶夫關輔天下之民
猶夫山東今

聖天子御極軫念元元首詔登曹魏別才賢以
昭殿最蓋欲知人安民躋斯世於唐虞三代
而已公執此以往安養所綏以飭兵政則邦
本斯固奸宄潛消所謂不越樽俎屹爲巨防
金湯莫踰矣由是而藩而撫而鄭而狐勲業
赫奕沛乎莫禦固公有餘裕也夫君子之澤
五世而斬蓋澤久則息息則思我也是故耳
棠思召緇衣思武子載之下人猶草芥之不嘗
五世爾矣公茲行也其政固在若嗣服之則
我民之思獨不如南鄭之民哉於是三君子

釋然張讌於郊咏歌以志焉西蜀江君歌伐木二章照其情也薊門王君歌六月五章冀其勲也東陽藍君歌鳴鳩卒章祈其報也及授簡於余言以贈之

贈國博陳君權 韓府左長史序

今制王國置長史司左右史郎古傳相秩五品正可謂崇自審理紀善教授下職任弗一若其屬可謂專惟天子有宰衡王國則史其道同可謂重然今之薦紳大夫士苟非恬靜不喜事自逸者未有樂是職者也夫其故何也蓋凡吏于王國者遷陟拔擢惟王國雖服有金紫不改授王國之政即其境土民吏事纖末弗與知乃國之人獲治之耳王賢則史榮否則辱或過戾是及感不已繇也往職散務間糾繩不至今察劾同有司茲其人詎樂之乎國博陳君大本吾陝人也乃今年拜韓王府左長史君乃無不欲之色夫史人未之樂也韓之爲府也僻在平涼朝邦邊地昔

何氏志雍曰平涼城中千室皆荆戶土垣而
朱門悉宗室人居日需祿府官不得則白衣
張券詈于衢夫史之難通天下而韓若是其
尤也然君之色無不欲者何也蓋天下之職
惟盡已難他何論焉故史也不特遷亦何有
不遷也不兼治亦何有不治也榮辱不已錄
亦何有辱不榮也故名盛則遷峻才大則治
張身正則王禮敬罔不榮雖察劾何如茲非
其在已者耶夫在已者盡王亦將曰師模曰
友誼而審理紀善教授下職焉敢不盡宗室
焉敢不做秩五品正必稱崇之亦稱惟宰惟
衡道蓋殊焉用者重則其人重奚必乎恬靜
不喜事自逸者樂也君也博學慎修而性剛
正直言偉節曾職教河汾河汾人化之今太
學人亦化之劇職要位罔弗堪者而爲之史
人固有爲君才德惜者而君宜欲之也昔漢
之儒生莫優于董賈董相江都賈傅長沙其
業顯其譽成其道不渝其德尊其所學奚負

馬不然則公孫光禹雖宰衡是竊乃萬代嗤
鄙矣夫孔程傾蓋終日晤言申召于審連篇
雅詠君之行也兩廳六堂諸僚友感斷金之
義伐木之情而相率問言于予予不文忝鄉
曲知己之深其何辭柳詩人有云朋友攸攝
攝以威儀又曰靖共爾位正直是與亦惟君
之勗之

卷之九

重刻三渠先生集卷之十

記

重建陝省城樓記

夫陝西二嶠重阻四塞爲回昔稱百二之區
巍然鎮重者其惟會城乎是故引鎬京以隆
基本控邊塞以豐輿圖挾隴漢以恢形勢實
夷虜之障中國之衛也城自後唐天祐間襲
隋之舊而約其制宋與金皆沿襲之以逮於
元莫之或易也我

太祖肇基洪武疆理天下命都督濮英增脩之
廣袤四十里其高數仞凡四門門二樓夾維
之南北山立東西翼舉規模弘矣乃今百七
十年於斯風雨震凌鳥鼠巢穴木斯墮焉石
斯圯焉守國保民防禦弗稱嘉靖三年冬中
丞王公蓋以巡撫至司土者其以告公公曰
板築之役其猶緩乎乃皇皇然立政陳紀正
諸吏習倣諸軍實酌諸民之利病而興革焉
明年百度咸秩衆志用熙於是登城而歎曰
城郭溝池以爲固亦國之所重也顧弊弊若
斯乎哉爰檄諸府衛周視慎度聿興厥工時
會巡按御史郭公登庸王公鼎和衷協諸布
政司布政使宋君冕孫君慎叅政楊君叔通
叅議孟君洋按察司按察使唐君澤副使張
君宏江君玠僉事姚君文清王君鈞劉君雍
都指揮周君倫張君鎬賴君銘西安守趙君
伸均預畫焉乃緣舊增新仍堅易腐財出於
官力用於民分閱其功均任其勞經始於嘉

靖五年正月二十日迨六月十五日訖用告
成夫天下之政銳者喜作喜作則煩故有新
作南門雉門者矣息者裕蠱裕蠱則廢故有
世室屋壞視而弗葺者矣二者皆非也斯役
也擇可勞焉與衆相宜規程省約何煩之有
及時舉墜先事防虞何廢之有况夫績宏而
令密工繁而用儉力衆而效速於財爲弗傷
於民爲弗病此法之所以善也

華陰縣何侯去思碑

余讀兩漢書循吏列傳凡十有八人云夫漢
以仁厚開基愛養元元郡邑長吏不即輕昇
治效或最爾書褒美增秩賜爵表列公卿四
百年間寥寥若此未嘗不嘆夫循吏之難也
嘉靖乙卯華陰陳侯希元者山東東阿縣人
清心約已感物化行朞年政成備載邑志後
十年甲子何侯蒞止端懿如陳政蹟尤著士
民愛慕如史稱凜凜德讓君子之遺風云何
侯名祥字子脩四川內江縣人也由鄉舉署

湖廣麻城學教諭擢尹華陰甫三年陞襄陽
府同知再陞南京刑部郎中華陰地狹比壤
衝會城公車絡繹歲無虛日氓庶疲於供役
里胥緣以滋弊候洞察隱瘼裁抑浮沉務在
懲慝植良剔蠹裕民而已乙卯關中地震華
山諸峪水北潄沃野侯冒暑衝泥甌渠築堰
踰年工竣民大賴之學宮傾圮不蔽風日侯
捐俸易材鳩工增構民不知費士獲肄業華
州之南商洛子午道也華陽川抵秦嶺中塗
廿里屬華陰地使節經過供帳累日侯謂用
少費繁檄諸兩臺俾華州洛南代攝爲便於
是兩臺報允竟獲免後邑民同堂與王佐毆
佐實病死佐弟居以私怨誣堂堂被掠服侯
庶得其情實居於理庠生蘇光父沒貧弗克
塋侯祈休濟焉其鞫獄平反憫窮恤孤類如
此乃若崇貞烈之風嚴奸宄之禁申諭俗之
歌廣作人之訓省躬砥礪式同冰蘖薦書錯
紛免辭謙賀政教井井更僕難悉可謂今之

循良古之遺愛也曩歲余過華陰侯任甫暮
頌聲嘖嘖路不拾遺比獲見侯惻惻無華舉
止顯雍簡默有度竊自嘆曰古所謂不言而
躬行者殆侯謂邪比讀員舉人一元狀益信
旣而員令門生郭懋官詣余請曰何侯之碑
衆謀僉同我公嘗嘉樂之矣若惠顧前好幸
爲圖焉余惟其棠之咏聞者興思硯山之碑
觀者墮淚蓋秉彛好善人心所同敷政愛民
惠德不爽今古一而已矣乃若何侯去任旣
久輿情不忘今茲之碑焉知不爲他日其棠
硯山之徵哉嗟乎爲政拂民民疾若讎讎去
則患息矣思何爲邪若侯者固可以風世也
乃紀諸貞石而係之以辭

辭曰粵稽華陰實維左輔征徃輻輳氓黎茹
苦溫溫何侯克明克溥化洽政成式歌且舞
其歌伊何維侯信古治善烹鮮道合絜矩其
舞伊何維侯克撫煦若春陽沐若膏雨侯之
去矣曷特何怡瞻依靡極憂心如縷瑩瑩豐

碑慰彼邦士刻辭載德嗣徽卓魯

重刻三渠先生集卷之十一

匏
卷之十一

行狀

前光祿大夫柱國少傅太子太傅吏部尚

書文淵閣大學士松臯許公行狀

公諱讚字廷美號松臯姓許氏河南靈寶人
也系出周文叔元兵馬都元帥諱威者西征
過靈寶愛其風土始家焉元帥三傳而生子
諱五五娶索氏生九九娶何氏生士信士信
娶陳氏生實實娶焦氏生教諭聚聚娶何氏

生太子少保吏部尚書謚襄毅進襄毅公娶
同邑張氏卒繼 秦府長史偃師高公進之
女則公之母也許氏自實以及襄毅公皆以
公貴累贈光祿大夫柱國少傅燕太子太傅
吏部尚書文淵閣大學士三世妣皆累贈一
品夫人高氏累封一品太夫人加贈一品夫
人公生而岐嶷力學強記襄毅公恐其爲勞
禁之弗止弘治乙卯以禮經魁于鄉丙辰登
進士除大名府推官是時襄毅公爲戶侍尚
書周文端諸公愛公才美作奕業清風詩圖
贈之公斷獄明允老吏畏服王某者夜殺人
劉某拾刃而鬻于市邏者執以聞官劉不勝
榜掠遂誣服公曰殺人不能形迹豈人情乎
迺令加訶察王果就擒開州李志方士某誣
染妖言

詔逮禁獄初使者捕志公與偕往既獲志乃老
農也使者以詞絀其輩欲併逮之公曰志尚
負冤更濫及無辜邪抗論竟已未幾志獲理

出其橈伏執法類如此壬戌授陝西道監察御史風裁凜然豪猾歛避正德戊辰襄毅公晉大冢宰用取清惠例改公爲翰林編修時逆瑾擅權銜襄毅公不附已乃誣檢主事署卽中爲越制矯

詔罷襄毅公調公爲山東臨淄知縣復以襄毅公及公曾薦尚書維公恭爲謬各罰米三百石公至官益務惠政隱瘼積蠹剔抉無遺邑咸父母之庚午丁襄毅公憂甲戌服闋陞浙江按察司僉事孝豐巨寇湯毛九攻陷諸邑勢甚猖獗公畫地戰守方略甚悉未幾寇平有金綺之賜戊寅陞副使閱視海道公謂嚴兵防則內守固禁私商則外交絕乃訓練督率靡間寒暑觸禁者雖大姓必寘于法宸豪構逆遠近震恐公既有備復集台寧丁壯數千人扼險待之卒以無虞是歲改山西督理學政公嚴矩範敦德行士風翕然變焉復以薛文清公爲我

明名儒上疏請從祀孔子略曰薛瑄天性高明
學識醇正以聖賢爲依歸以道德爲己任權
勢利達無以動心死生患難無以移志至于
著述又皆性命道德之極陰陽動靜之秘真
聖人之徒也不報繼陞四川布政司叅政西
陽土官構亂數年不鮮臺臣檄公治之公據
法原情諭以禍福二姓輸服稽首癸未陞四
川按察使甲申陞浙江右布政使再轉左布
政使浙財賦填委更胥因緣爲蠹公蒞政摘
補發戍者四十餘人先是易買 上供諸物
率豪右請托轉販取贏公分委郡邑令富民
給納人大稱便丁亥陞光祿寺卿歷陞刑部
左右侍郎武定侯郭勛不法
上命公勘理勛黨金輅孫鐸怙
旨免掠抵調不服公疏乞刑訊
上特許之迺竟結其罪己丑改刑部尚書周公
倫于南京 命公代之公上疏辭遜且言周
某老成練達非臣所及

上曰卿性資公敏執法平明不允是歲與待
經筵九月奉

命議郊祀禮略曰分祀者致嚴辨之道也合祀
者通功用之妙也從祀天地晉宋以來積至
千百餘位繁雜太甚我朝定以二十四壇
繁簡適中

皇上敬天勤民昭格天地者不在禮文而在
淵德伏望鑒茲大典慎重舉動

上不允表英者揚之鉅商也

武皇帝南巡錦衣指揮施恭與勢璫結連矯
旨簿錄其家至是英妻以狀聞

上命公讞議勢者懼巧繁伺請不可得竟寘恭
于理是時重獄累起人懷疑畏如行人薛侃
之議親藩監生詹啓之論銓部崔昂之違法
劉永昌之于政公咸持平例務存國體奏讞
以上

上悉可之辛卯 詔改公爲戶部尚書舊制河
南軍餉監兌於大名小灘時有奏改回隆鎮

者公言舊制已定若一旦更遷則運舟公署
勞費滋多不改便兵部議興甘肅屯田請發
銀三十萬兩公疏言屯田弊在兵弱虜強士
不得耕爾今不究其本而惟末之圖虧損國
計非計之上 召給十萬兩公復慮益法久
滯疏陳四弊謂必減價而釐勸罰量地而免
搭配俾商人樂於趨赴餘益不踰常制有附
帶者以法抑之然後饒政可通是時諸省大
祲公奏發帑藏蠲租賦賑恤之既而上疏以
爲救荒固當賑恤尤在寬省若有司不恤民
隱發帑何益請下臺臣凡有司一切害民者
咸從重理

上皆嘉納之先是部議備荒今有司積穀稽多
寡爲殿最公謂今日之積穀卽舊制預備倉
之儲不宜於預備之外復立積穀之名若以
苛爲能則氓庶歛怨是利民而先病之也甲
午高大夫人疾公陳情乞休

上特令給驛歸省九月高卒公痛不逮殮哀毀

踰制是歲大冢宰缺越丙申 詔特改公公
疏辭

上曰卿醇誠平易操謹素著不允十一月復

勅公詣 闕俟制滿蒞事其爲

上所眷注如此服闋赴 召益思奮勵迺首疏
四弊曰疏銓選以決壅阻公薦舉以復久任
傳無故改調之途抑奔競濫陞之習

上嘉納之丁酉 皇子誕生

上製嘉喜歌公恭和以進御史游居敬疏論今

之倡道學者陰懷邪僻輒建書院請治之公
曰居敬雖過激然 朝廷建學令治經史豈

有它傳習者奏毀其書院武定土官阿台者
乞以土婦襲官部議又格雙警殺爲患公曰夷
狄當以不治治之疏從其請先是六部移牒
內府諸司皆署尚書名禮部尚書元匡霍公
凡三抗疏請加釐正公曰署名非爲諸司尊
朝廷也且百年舊典不宜輕變

上是之是歲冬六年考績

上遣中使賜羊酒寶鏹加太子太保榮祿大夫
已亥 郊祀禮成加少保光祿大夫再授柱
國二月扈從

聖駕恭謁

顯陵公䟽勸節程途慎動止保

聖躬全

聖孝

上駐蹕潛邸 賜金勞之四月

車駕還京舉人盧綱誣知府孫存張一厚臺臣
坐染其事

上欲逮詔獄公言綱奏未可遽信宜遣使議報
迺獲寬降公尤愛惜人才前後三上䟽薦廢
閒官戶部尚書李公廷相等凡八十四人略
曰臣聞天地無棄物聖人無棄人近蒙

皇上諭臣辨忠邪正庶官臣亦謂大臣報主
以尊賢爲急務以蔽賢爲不祥諸臣省愆有
年乞舍短取長俾得效勞以紓

陛下憂治求才之意

上多從之辛丑

太廟災公引咎乞休詞甚激切

上特允致仕仍令給驛公抵家祇謁先壠增飾家廟作鄉約闢別墅爲終老計是歲十月詔復起公仍理銓事公懇辭

上曰卿德性溫醇政務練達不允十一月還

朝公疏尊朝宇正士風二事時虜寇山西公兩疏安攘方略復以本部積弊十事條列上請

上悉採納大工告竣內臣濫疏陞賞公言名器可惜酌論如制甲辰一品六年奏積加

太子太傅

上仍遣中使賜羊酒寶鏹九月勅公兼文淵閣大學士入閣辦事公遜辭益切

上不允曰卿久歷部政學行老成亟合治事公既當密勿愈自抑畏入則贊翊嘉猷出則順言上德每膺顧問議大政與少師介溪嚴公太子太保陽峯張公協恭商確介溪公亦

雅重公多從其言乙巳

太廟禮成加少傅十一月 王牒成公以摠裁
勞蒙 賜金綺無何病作疏乞調攝時
上切於倚毗迺以公自愛令回籍冠帶閒住歸
至淇手足痿痺抵家杜門謝客出所獲祿賜
分贍族人捐百金助修孔子廟山川壇置田
數十畝爲贍 辰之所蓋老子故宅也歲時
及

萬壽節必齋沐扶掖頓首祝賀每恭聞

上起居喜動顏色蓋其愛君之心老而彌篤故
爾公歷官幾五十年晚爲

上知遇凡

宗廟朝廷有大典禮 命公將事爲多如上

太祖高皇帝

孝慈皇太后廟號上

皇太后徽號冊立 皇太子 景王 裕王先

期享

廟公皆捧 主 明堂大享

皇太后祈安

車駕謁山陵

皇太子試週

皇子剪髮公皆

告

廟遣祭先農者二分獻

方澤者二代

祀

求孝殿

求明殿

夕月壇國子監先

師者各一上

皇天徽號克導輿官者一

冊封妃嬪克副使

者一

封敬妃填冊者一

策試貢士讀卷者

四考覈天下諸司者三考覈部院諸司者一

其錫予蕃庶皆出異數迺

賜勅者一

誥者四飛魚服者一銀瓢綵帶者二金綺者十

有一其它不可勝紀公乃建樓貯之扁曰尊

恩云戊申七月忽患滯下越廿五日疾亟謂

諸子弟曰吾父子兄弟俱列上卿予以涼薄

四歷部閣中間履危機犯異議者不知凡幾

賴

上知我最深迺得至此茲已矣無由復覲

天顏以謝

國恩爾輩有官守者當思圖報復

戒子儻曰爾積善延祚以求無忝豐殖厚葬

吾不欲也遂卒距生于成化癸巳七月四日
享年七十有六先是里人見大星殞于居第
之西後四日公卒蓋不偶也公兄弟八人兄
詔癸卯舉人誥太子太保南京戶部尚書謚
莊敏弟記次詩工部都水清吏司主事詞長
蘆都轉監運司運使誌青城知縣論都察院
右副都御史元配李氏兗州府推官李公祥
之女累封一品夫人先公四年卒

上遣禮部尚書費公案論祭行人徐君洛營葬
事詳見介溪公所撰墓志夫人生男子二人
長備早卒次即饌以公廕歷官辰州府知府
改禮部員外郎辦中書舍人事賜四品服側
室王氏生女子三人長適都指揮張蓋臣次
適監生張良士次適庠生王陽生孫男二人
長茂祿次茂禎公姿幹玉立風度凝遠溫粹
詳雅與物無忤平居靜坐一室玩古圖書絕
不問家人事尤篤孝友初舉進士襄毅公教
以謹言釋交潔已勤政終身誦服事母太夫

人克盡色養每獲

賜上珎必遣人致之兄詔卒鞠子若孫俾克成立待諸弟妹恩禮備至其睦族卹黨周急賑乏惟日不足也公自以門閥赫奕每懷憂懼恒書諭子弟戒以驕逸荐膺顯擢皆出

上意故終身乞骸者凡數十疏其自守如此初在刑部

上懲舞文之弊每有疑獄銳於究竟屬司至戰慄失措公持守既嚴讞覆據法故

上爲信悅其在戶部悉心國計凡內府供億宗藩請乞邊儲漕運商稅田賦經畫釐革可垂永久吏部自弘治後獨公當任者十年每一銓注必參酌人才強弱地方繁簡風土南北務求允當請托苞苴悉拒不行尤惡有司貪暴故辨復者至部公自覈不少貸立朝言動和易自視歉然至論官守及朝廷大事則毅然有不可奪者今大學士龍湖張公稱之曰平居呐呐若無所勝及夫決大政析大

疑論確理道翻正治亂其氣勃發若洪河東
下莫之能遏至於底定則浮光靜影耀金涵
碧湛乎可覩然而淵停浩渺莫可救止不知
所謂深且遠也世以爲知言公天性好學老
而彌篤所著有松臯集續集讀史詩論五經
題義臆言三曹奏議諸集行于世用賓往厠館
職數侍公教勲業文章皆所見聞竊謂馬端
肅之忠亮韓忠定之持守張忠簡之沉毅吳
文定之博雅公兼之矣而天不憖遺隕星兆
變老成淪背朝野惻傷惜哉茲僉將以明年
月日于城南石甬山東麓啓孀夫人之壙合
而葬焉玄宮有石墓道有碑將托於當代鉅公以光
不朽用賓不揣淺薄彙括大略如此伏惟
台明俯賜採擇幸甚

行收

卷十一

卷之十一 龍終



